

andar a nave. E questo e altro tutto n'è stà confermato esser el vero; sì che seti avisato de tutti el successo etc.

97* *A dì 9 zener, domenega.* A gran conseio vene assa' numero di zentilhomeni, credando se publichasse *de more* la condanaxon fata nel conseio di X contra sier Zuan Antonio Minio; ma non fo publicata, o per più teror, o perchè non era da meter cause aperte, ma dubiose de interpretare; e per questo non fo publicà.

A dì 13. Fonno letere di 20 novembrio, di Alexandria, dal consolo. Scrive, el soldan era in combustion con i schiavi; e havea trato e mandato in Candia formento, stera 5000, a ducati 2 1/2 la ribeba, e trazerave altri X milia stera, che fo bona nova, perchè in Candia era grandissima carestia. *Item*, le galie non erano zonte, e non haverà cargo per do galie, non havea da dar piper del soldan, *tamen* el soldan voleva i danari, e in Alexandria e a Damasco tutte botege sta serade, temeno il sachomano.

In pregadi fu preso far uno orator al gran maestro di Rodi, con ducati 70 al mexe neti, per ringratiar soa signoria reverendissima di quello ha fato, e stabilirlo in la bona disposition, che a tempo nuovo insirà con armada. Et, a dì 20, rimase sier Gasparo Malipiero, era provedador sora i conti, *quondam* sier Michiel, el qual refudoe. Et, a dì 31, fo poi electo sier Nicolò Dolfìn, fo sinico, *quondam* sier Marco, qual *etiam* refudoe. *Denum* fo electo sier Domenego Dolfìn, fo capetanio al colfo, *quondam* sier Dolfìn, qual accettò e andò, come dirò di soto.

Item, fu preso dar forma a li pagamenti di sopracomiti, quali se pagano di le 30 et 40 per 100, poi fato el deposito, e fo preso dar ducati 20 al mexe, 6 mexi da poi ritornadi, et dar danari e pan a tutti i salariadi di galia ogni mese, *prout in parte*.

A Roma el pontifice, sollicitato da sier Marin Zorzi, dotor, orator nostro, *iterum* à concesso el jubileo et fato uno breve a fra' Raphael da Milan, *ordinis minorum de observantia*, che vegni *iterum* a Venetia a predicar la cruciata in *pœna excommunicationis*; el qual, per comandamento dil suo vicario general, era designato a Fiorenza. La qual cruciata se estende per tutto el dominio veneto da terra, dura per in fina Nadal proximo, *videlicet* continua la prima.

In questi zorni, disputandose in coleio, per richiesta de li inquisitori, sì, per le sententie tolte de volontà per li heriedi del doxe morto, *videlicet* Nani e Pisani, se dovesse vender a l'incanto i ar-

zenti tolti, e fo deliberà per la Signoria, fosseno venduti; e ozi in Rialto, a gran concorso de populo, fonno incantadi e in gran parte venduti, da ducati 7 fin 10 la marcha. Fonno in tutto marche 820, e vendesse in contadi per Bernardin di Ambrosij, secretario, presente li heredi soprascritti.

A dì 16 ditto. Fo publicata la condanason fata per sier Beneto da cha' da Pexaro, procurator, capetanio zeneral di mar, a dì 14, in Porto Panormo, contra cinque sopracomiti desobedienti e pusilanimi, zoè sier Polo Nani, *quondam* sier Giacomo, sier Zorzi Trivixan, *quondam* sier Andrea, sier Marco Antonio da Canal, *quondam* sier Francesco, sier Nicolò Barbarigo, de Candia, e Piero Campitello da Trane, che siano per anni 5 privadi de sopracomiti e capitaniadi de nave e galie, e perda el salario livrado dal zorno del fallo in driedo. Et questo fo per caxon, che ditte cinque galie non volseno, nè 98 ardino investir 7 fuste de' turchi, trovade a dì 6 septembrio sora Cao Malio, le qual remurechiavano le nave di 300 bote de Manoli Sodatilo di Candia, presa carga di formenti andava in Candia, come ho scritto di sopra. Et za, comunicato consilio tra lhor, diliberato de andar a investir e recuperar le anime prese et la nave, et quando fonno a presso, in geto di bombarda, levada vuoga, lassono quelle andar; e soprazonse nave e galie francese, e turchi abandonono la ditta nave; e cussi la scapolò.

Vene di Franza sier Francesco Foscari, el cavalier, ritornato orator, et rimasto podestà et capetanio a Ravena, el qual referite la sua legatione; et pocho da poi refudò a Ravena, come dirò.

Ancora zonse qui, venute a disarmar, X galie di le più vecchie, et a Parenzo fonno disarmate. Vi andò el provedador sora lo armar e il pagador a l'armamento, qualli portono ducati 6000; et per aver danari tolseno ducati 13 milia, erano in procuratia di la commissaria di sier Filippo Trun, procurator, con condition renderli subito.

A dì 16. Si partì sier Zuan Antonio Minio, per andar al suo confin in Arbe, senza dir altro, justa li mandati auti.

A dì 17. Fu eletto, per scurtinio, nel mazor consilio capetanio e provedador a Corfù, in luogo di sier Zuan Paulo Gradenigo, refudoe, sier Alvixe d' Armer, fo provedador al sal, *quondam* sier Simon, fo fradello di sier Alban, che se abrusò, patron di la nave, quando investi l'arma' dil turchio; e a dì 23 fo poi electo baylo in dito loco sier Antonio Loredan, fo provedador al sal, *quondam* sier Francesco, fo fradello di sier Andrea, che se brusò